



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tiryimyim@aolima



tir yimyim

TAPAK 3

Tir inyaksü asoshi toktepha kodanga maitsütsü: Trump

2024 küm atema Opposition longjemtsü merangtsü: Nitish Kumar



VOL. XX NO. 180 (ADOK 180) DIMAPUR YANGTEPNÜ (THURSDAY)

RONGCHII (APRIL) 13, 2023

₹ 5.00

NMA-i Nagaland Governor dangi shidi ka zülü

Dimapur, April 12, 2023 (TYO): Naga Mothers' Association (NMS)-i Bodbarü Nagaland Governor dangi shidi ka züluba nung parnoki yimjung, lokti nung tesünep aser tetsür temeten ajungketba mapa inyakba shia lir.

Angami Public Organisation (APO) aser Chakhesang Public Organisation (CPO) ajanga Chief Secretary dangi NMA aija shidi balala züluba sülen NMA-i tanü Governor nem kuli kar shia shidi ka zülüogo.

NMA ya 1984 küm kija kari tentet saka kin balala nungi tetsürtem dena telok tuluba aküm. NMA tentetba sülen nungi yimjung, tetsürtem tebilemstü aser lokti dak sendakba onüktem atema inyaka arur ta NMA-i ashi.

Nagaland nung Urban Local Body elections atema NMA-i Joint Action Committee on Women Reservation (JACWR) ka tentet aser iba ya state sorkari Nagaland Municipal First Amendment Act 2006 agizükba sülen tenteta liasü. JACWR nung Eastern Naga Women Organisation (ENWO), Watsü Mungdang, Naga Women Hoho Dimapur (NWHHD), Tenyimi Women Organisation (TWO) aser Naga Mothers' Association indang tribe units densema liasü.

JACWR-i May 31, 2011 nü Chief Minister Neiphiu Rio den ajurutepdang ashiba nung ajemdaker okadak ken o benok. Iba sülen taoba CM T.R. Zeliang-i nangzükba agi January 26, 2017 nü JACWR-i okadak nungi ken

o meyipa agi. NMA-i India nung Human Rights Organisation tulutiba People's Union for Civil Liberties (PUCL) den tesentaktep lir ta asübaji tiyazü ta NMA-isa Nagaland Governor dang shiogo.

February 2017 nung mepetmesü adokba sülen Angami Women Organisation (AWO), Chakhesang Mothers Association (CMA), Sumi Totimi Hoho (STH) aser Lotha Eloi Hoho (LEI) nung dang tashiyim agi NMA nung madentsü tetuyuba agüja liasü. Ajisüaka, Rengma Mothers Association (RMA), Pochury Mothers Association (PMA), Kuki Nute Kiloikhom Nagaland (KNKN) aser Zeliangrong Mipui Organisation (ZMO) tribe units den kin balala nungi kijatem NMA nung dena lir, ta parnokisa metetdaksü.

"NMA-i Naga nung sobaliba ozüing, inyaksangshi menentsür aser samatsür ta aitsübaji magizüker. Tetsürtem aser tetsütem ama onoki Naga nung sobaliba aser inyaksangshi kanga akhümtsübur aser tetsürtem tashi itdaksüba aser tetsür temetentem kümzükba ayuba policy ajak agizüker" ta NMA-isa ashi.

"NMA-i municipal elections atema yimjak nung olemtep aliba asoshi mepelar ta ashir saka NMA dak public policy tem atema sendentem aser shisatokden ayonga agitsü temeten lir" ta President Abei-Ü Meru aser General Secretary Lochumbeni Humtsoe nati shidi nung shia lir.

BJP sorkartemi tenla kitem raksatsür: NPCC

Dimapur, April 12, 2023 (Agencies): Northeast nung BJP sorkartemi tenla kitem raksatsür ta Nagaland Pradesh Congress Committee (NPCC)-i tai tongloksüogo.

April 11, 2023 nü Manipur nung Evangelical Baptist Convention Church, Evangelical Lutheran Church Manipur aser Catholic Holy Spirit Church raksatsüogo ta NPCC-i ashi.

Maneni, tawa tu Assam nunga tenla ki ka raksatsü ta parnokisa ashi.

"Lisopur tesemtem nung construction permits aliba tenla ki kwi ka lir aser construction permits maliba tenla ki ajak raksatsütsü asü?" ta NPCC-isa tasüngdangba ka agütsüogo.

Manipur nung raksatsüba tenla ki kabo 1974 nung yangluba liasü saka Manipur Chief Minister N Biren Singh-i iba indang kecha mashir aser Parliament mesüra Assembly nung shingaiya ola madoker, ta NPCC-i sangdong ka nung ashi.

Khristantem teimba ser aliba state tem- Nagaland, Mizoram o Meghalaya nung Chief Minister temia ola kecha madoker. Manipur nung Khristan nütüsing yongsük 41% lir saka state sorkari pei sensotem nem akhümtsübu magütsür ta parnokisa metetdaksü.

Parliament aser state Assembly tem nung Khristan züngsemtem tashimaitba BJP-i asadantetogo. Khristan züngsemtemi tashi aginüba aser BJP sorkar dang tenüing tajung aginüba ajanga pei tamangba yimsü asoshi tebilemstü mabener, ta NPCC-isa ashi.

Khristantemi sen aser tashi dang nungi aroka pei tamangba atema bilemstü mapang tongogo. Pei tamangba yimsü aser maitsü kümzükba ayutsüla, ta parnokisa sangdong nung shia lir.

Northeast nungeri asen tamangba yimsü aser maitsü asoshi lendong aliba asoshi mapa inyaksüla ta NPCC-isa metetdaksü.

NE ajunga nung AFSPA agientsüla & ILP tenzüktsüla: NESO

Dimapur, April 12, 2023 (Agencies): North East Students' Organisation (NESO)-i Northeast nung AFSPA agientsü aser Inner Line Permit (ILP) mapa tenzüktsü takhangba agütsüogo.

Northeast state tem nung Common University Entrance Test (CUET) magitsüla kechiyong kaketshirtemi linük kübok tanga tesemtem nung aliba kaketshirtemi memener, ta NESO chairman Samuel B Jywra-i ashi.

Ao Senden-i Naga Mothers Association tanishirtem aitsür

Dimapur, April 12, 2023 (TYO): March 28, 2023 nü Nagaland sorkari Nagaland Municipal Act 2001 ajunga agientsü lemtetba sülen pei ajangzüktsü tebilemba abenba nisung kari tim masüba inyaka aruba repranga arudar ta Ao Senden-i Bodbarü metetdaksü.

Nagaland sorkari nübotem ola angaa Nagaland Municipal Act 2001 ajunga agienba atema tanga Naga kin hohotem den külemi Ao Senden-ia tenüingsang agütsür, ta Tir Chubawati Longchar aser Tongti Tezülur Arentemjen Jamir nati sangdong ka nung ashi.

"Tanü Naga Mothers Association (NMA) jenjang kecha mali saka nisung kari iba tenüing amshia parnok taginübatem

Ano, NESO advisor Samujjal Bhattacharya-i Northeast nung technical aser non-technical institutions talila lapoktsü takhangba agütsü.

Northeast nungi illegal Bangladeshi immigrants (IBIs) meyipa yoktsüla. NESO-i Citizenship Amendment Act magizüker" ta Bhattacharya-isa ashi.

Armed Forces (Special Powers) Act, 1958 ajanga Northeast nung tashiyim mapa

aika inyakogo aser tesüsabubaji December 4, 2021 nü Nagaland kübok Mon district nung Oting nung atalokba liasü, ta Bhattacharya-isa ashi.

"Onok AFSPA ajanga kanga timtemer anungji Northeast nungi agientsüla" ta paisa takhangba agütsü.

Northeast nung lisopurtem kümzükba ayutsü atema Inner Line Permit (ILP) mapa tenzüktsüla, ta NESO advisor-isa takhangba agütsüogo.

atongtsü meranga inyaksangshir. 2017 küm Nagaland Municipal Act 2001 anema noktadng tapayutsü taküm 3 lalu saka tanü parnok tetsütemi item jabsotem mezüingmeshir" ta Ao Senden-i ashi.

State sorkari Urban Local Body (ULB) election lemtetba ama agira 2017 nung ajuruba ama tensa tamajung ajurutsü ana nung dang liasü. Ajisüaka state sorkari mapang shitak nung NMA 2001 agienba ajanga nübotem temulung anisüingzükogo, ta parnokisa ashi.

Naga kin hohotemi Nagaland nung ULBs election agitsüba anema menokdaker saka iba indang Act ya nübotem taginüba ama asütsüla aser Nagaland state

sasep nung Arrla 371A dak mekongshitsüla ta dang noktaker, ta Ao Senden-isa jangjashitsüogo.

Nagaland state sorkari tekaratiba nung ULBs ketdangtsü atema Act tasen ka yanglutsüla aser Assembly nung mebenokdang tamasa kin hohotem den asüingdangyatsüla ta Ao Senden-isa ashi.

Nagaland ya lisopur state ka lir aser yimtenren ken o balaka ajuruba ajanga kümtetba state ka lir. Anungji onoki People's Union for Civil Liberties (PUCL) tanishirtem aser tanga lennirtem Nagaland-i arur sobaliba, inyaksangshi aser ozüingtem osang tejangjaba angazüktsü atema jaoker, ta Ao Senden-isa metetdaksüogo.

Dimapur nung Road Over Bridge yanglutsü atema traffic tendangtsü

Dimapur, April 12, 2023 (TYO): Dimapur nung NH-29 Hotel Tragopan anasa ROB (Road Over Bridge) yanglushitsü atema Dimapur District Administration-i traffic tetuyuba kar agütsüogo.

ROB maparen tenzükba inyakdang benshitsü atema anogo ananü atema Dimapur/Chumukedima/ Niuland Traffic tendangtsü ta Dimapur Police-i metetdaksüogo.

April 14 nungi 15, 2023 anogotem ROB nung gari mesenzüdaksütsü aser iba atema tsüinglanglen agüja aliba ama senzütsü.

Anungji Dimapur, Chumoukedima, Niuland aser tanga district tem nungi arurtemi ketdangsurtem den amalitepa traffic tetuyuba sülen anidaksü mepishir, ta Dimapur Police-isa metetdaksü.

Trial run tenzüktsü : April 14, 2023 4:00 AM

Trial run tembangtsü : April 15, 2023 10:00 PM

1. April 14, 2023 anepdang 4:00 ako nungi aonung 10:00 ako tashi heavy/transport garitem mesenzütsü. Item garitem aonung 10:00 ako nungi anepdang 4:00 ako tashi dang senzütsü.
2. Newfield check gate nungi

Dimapur adena Kohima tsütsü aoba Heavy/transport garitem Khermahal-City Tower-Dhobinalla-Signal Angami-Thahekhu-Thilixu-Toulazouma-Lungwiram junction-3rd Mile junction-NH-29 ajanga senzütsü.

3. Dillai check gate nungi Dimapur adena Kohima tsütsü aoba Heavy/transport garitem ajak DC Court junction adena PWD-Midland-Dhobinalla-Signal Angami-Thahekhu-Thilixu-Toulazouma-Lungwiram junction-3rd Mile junction-NH-29 ajanga senzütsü.

4. Kohima tsütsü nungi Dimapur-i aruba Heavy/transport garitem ajak Green Park junction (5th Mile) nungi Sovima-Selhouphe junction-Nagaland Zoological park-Thahekhu-Signal Angami-Dhobinalla-City Tower/Midland-Tragopan/DC Court junction-Newfield check gate/Dillai check gate ajanga senzütsü.

5. Ano, Kohima tsütsü nungi Assam leni aoba heavy/transport garitem 5th Mile Jn-Purana Bazaar - Veterinary Police point ajanga Khatkati check gate leni aotsü akok.

alaka tanüingba gari ajak asoshi ROB dak alaka tanga lenmang ajak nung senzütsü akok.

- Tenokdangbatem:**
- # GS Road aser Marwaripatti nung lenmangtem One-Sided Parking Zone asütsü.
 - # Khermahal Road, Eros Lane aser Deluxe Point ajurutepba lenmang No-Parking Zone asütsü.
 - # Deluxe Point tsütsü nungi Eros Lane leni gari arutsü memelatsü.
 - # Khermahal Point nungi Deluxe Point leni gari mesenzüdaksütsü.
 - # Eros Lane nungi Deluxe Point leni aruba garitem Railway flyover leni dang yoktsü.
 - # DNSU Office/Fire Station point len nungi Police Colony - Hotel Jal Mahal Junction-i aoba lenmang One-Way asütsü. Hotel Jal Mahal Junction nungi Fire Station leni gari mesenzüdaksütsü.
 - # Railway Station road junction nungi Durga Mandir - GS Road - Army Supply junction (Jakhalu Complex) lenmang nung Two-Way traffic melatsü.
 - # Traffic repranger lenmangtem One-Way mesüra Parking Zone ta sangdongtsü akok.

Sorkar maka inyaker ya nùbur tenzüksü asoshi lir: Imkong L. Imchen



Department of Soil and Water Conservation ajanga April 12, 2023 nü Sechu Zubza nung aliba Research and Training Centre nung Advisor, Imkong L. Imchen nem tenünsang agütsüba sentong ka agidang tangokba noksa nung angur.

Dimapur, Rongchii/April 12 (TYO): Department of Soil and Water Conservation ajanga 21st Batch, Soil Conservation Assistant (SCA) Trainees den tepila sentong aser Advisor, Soil & Water Conservation and Information & Public Relations, Imkong L. Imchen nem tenünsang agütsüba sentong ka April 12, 2023 nü Research and Training Centre Sechu Zubza nung agia liasü.

Sentong nung Advisor, Soil & Water Conservation and Information & Public Relations, Imkong L. Imchen-i ashiba agi, sorkar mapa inyaker ajak nùbur tenzüksü asoshi lir aser yamaji nia nùbur tenzüka junga yimsü asütsü asoshi shim.

Soil & Conservation Assistant (SCA) ama graduate asürtem nem tazüng aliba nung ajemdaker mapa agütsütsü asoshi sorkar den jembitsü, kechiaser item mapa nung technical tsütsü mongintem nüngdaker aser SCA ya item mapa asoshi tetemsü lir, ta pai ashi.

Sen ajema lezmüksüba mechi Department ajanga

aginüba ama meinyakteter aser yamaji tepang agi meshitetba timtem ajurua arur, anungji Department ajungkettsü asoshi akok tashi yariteptsü, ta Imchen-i ashi.

Tayongzükbatem agizükba aser tazüngla ka nungi tagitsü inyaktetba yimya ka küdak lir, anungji Department nem terenlok maparen tali bener arutsütsü asoshi ni bendanga agütsür inyaksü, ta pai ashi.

Senotsü ajema lezmüksüba ajanga department nung takotet ketdangsur 107 tashi inyaksü mapa kecha maka lir, anungji Department dangi terenlok maparen tali bener aruba nung rangloksü, ta Advisor Imkong-i ashi.

Research and Training Centre tajungba akumtsü asoshi lenmang bushitsü aser Department inyakyim kanga junga asadanga meteter nüngdakba mera agitsü tejangraba lir, ta pai ashi.

Iba sentong nung Soil Conservation Assistant training takok ngua agirtem nem pai graduating certificate agüja liasü.

Iba sentong tenzükdang Director, Soil & Water Conservation, S.K Hekshe-i Department dak sendakba inyakyim lemsatet aser iba mapang Department nung takotet ketdangsur 100 dak tema lir aser ano staff 700 dak tali lir, ta ashi.

Paisa Laboratory Science, Horticulture, Soil and Water Conservation, Forestry, Agriculture amala nung takotet nisungtem aliba indanga shisem.

Ketdangsurtem ita pezü ser tesadang Soil and Water Conservation aser Agroforestry training ogo aser ano GIS aser Water Resources nunga qualification talila lir, ta Director-i ashi.

Department tenüng nung Addl. Director (S&WC) aser Principal, Research and Training Centre Sechu Zubza, L. Chubaonen ajanga Advisor pela agizükba o jembi aser tesem tezülen aluyimer ajungkettsü asoshi nùbur nem Department ajanga tongtipang osangtem sangoktsür, ta ashi.

Advisor lenisüba kübok Department tejakleni aotsü aser lenmang balala nung takok angutsü imlar, ta pai ashi.

Iba den ano 21st Batch SCA graduate asürtemi Department nung aliba staff tem den külemi tejangraba tulu nung mapa inyaksü imlar, ta paisa ashi.

Iba sentong nung Commissioner & Secretary, S & WC, Libanthung Lotha, IAS menden liasü aser training agirtem tenüng nung Akhala Sangtam-i jembi, ken ka Lidangba aser medemer temi aden aser ASCO (R), Zuchumi Ovung-i melepzüng o jembia liasü.

P&T Department ketdangsurtem Dy CM Zeliang den senden ka amen



Nagaland Civil Secretariat indang Conference Hall nung April 12, 2023 nü Planning & Transformation Department ketdangsurtem senden ka amendang Dy CM, T.R. Zeliang-i o jembidang tangokba noksa nung angur.

Dimapur, Rongchii/April 12 (TYO): Deputy Chief Minister aser Minister, Planning & National Highways, T.R. Zeliang den Planning & Transformation Department ketdangsurtem senden ka April 12, 2023 nü Nagaland Civil Secretariat Conference Hall nung mena liasü.

Iba senden nung jembidang, taoba mapang development aser planning tsütsü temelenshi aika aruba ajanga Planning & Coordination Department tenüng Planning & Transformation dangi melentsüsa akum, ta Zeliang-i ashi.

"Coordination nungi Transformation dangi melenba ajanga asenok ajak asendenshia Department kisüng masü saka state melenshitsu asoshi pei shilem mapa inyaksü tamang akar," ta Dy CM, T.R. Zeliang-i ashi.

Department balala kübok district aser sub-division nung

terenlok mapa inyakba DPOs temi metettsüla, aji asünung dang küm ishika tsüngta state melenshitsu, ta pai ashi.

"Ibaji tanü sorkar mangdang lir aser asenoki nükjidong tsütsü tejak shir meranga inyakra mangdang asangdang akumtsü," ta ashi.

Iba sentong nung Deputy Development Commissioner, Kezunipeu Teno-i sarasadem, Principal Secretary & Development Commissioner, R. Ramakrishan, IAS ajanga pela agizükba o jembi.

Planning Department indang presentation ka Deputy Development Commissioner, Chorayi Veyie-i agütsü, Deputy Development Commissioner, Pudusul Luho-i scheme balala indang osang lemsatet aser Project Director, Er. Mhathung Kithan-i GIS & RS Centre indang osang agüja liasü. Iba senden nung Deputy Development Commissioner, N. Nlumo Murry menden liasü.

Konyak civil society temi par legislator nem tenünsang agütsü

Dimapur, Rongchii/April 12 (TYO): Konyak Union-i anir Konyak civil society temi April 11, 2023 nü Konyak Union Conference Hall nung 14th Nagaland Legislative Assembly nung Konyak nung legislator nem tenünsang agütsüba sentong ka agia liasü.

Konyak Union tir Tingthok-i pela agizükba o jembidang, mazüngi liaka legislator tem aruba asoshi pelaba lemsatet aser tenünsang agüja liasü.

KNSK tir Ponglem-i iba

sentong nung o tatsüka jembidang Konyak nung temi timtem balala ajuruba, talisa Mon district nung lenmang majungba aser mapa manguba tebilemstütem lemsatet liasü.

Konyak Students' Union tir Noklem-ia legislator tem dang lenmang, electricity aser mobile network tebilemstü repringtsü mepishia liasü.

Paisa Konyak Students' Union Platinum Jubilee indanga metetdaksü.

Konyak Legislator tem

tenüng nung Advisor, Social Welfare, Noke-i jembidang terenlok asoshi yimjung aser amalitet kanga tongtipang lir, ta ashi.

Lokti ka yangertsü asoshi educational degree ya teperi masü saka Konyak nung tera aser puti otsü meteta alitsü nüngdaker, ta pai ashi.

Iba sentong nung KU tatong tir Chingwang Konyak menden liasü aser Yuwang aser medemer temi temeja ken ka dena liasü.

Burma Camp kitsük-kirong lendong ajurur alir nem teyari agütsü



Dimapur, Rongchii/April 12 (TYO): State Chairman Abeni TCK Lotha aser State General Secretary Akhale V. Khamo nungeri shisa agütsüba nung ajemdaker Program Officer, Nagaland Red Cross, Merenyanger aser par teloki Kohima nungi blanket 100, tarpaulin 10 aser mürekmejuba oset 50 alia bener alua Burma Camp East Block, Dimapur nung kitsük-kirong lendong ajurua alir nem April 12, 2023 nü agütsü, ta Dimapur Red Cross sangdong ka ajanga ashi.

Item teyari oset lema agütsüba maparen nung colony chairman Lumdibe Zeliang aser youth president Mhonthung Lotha aser par teloki yaritepa

liasü. Iba mapang Honorary Secretary & Vice-Chairman, Dimapur Red Cross den volunteer Neizo Kusoh nungertemia yaritepa liasü.

Iba sentong nung Vice-Chairman Ajay Sethi, Honorary Secretary Kamala Kanta Paul aser Colony Chairman Lumdibe Zeliang nungeri yangji alirtem dang ki o jen yanglushiba mapang kumdanga inyaksangshitsu aser mi kanga kumdanga amshitsu ajungshia liasü.

Iba kitsük kirong lendong nung kibong 600 aser nisung 1803 dak kongshia liasü. Iba lendong nung asülar jala nem Dimapur Red Cross ajanga sen teyari agüja liasü.



World Oral Cancer Screening Month nungtem nung school tanurtem asoshi Oral health screening camp ka April 12, 2023 nü Little Flower School aser Government Primary School, Pungro, Kiphire nung ayongzüka liasü. Iba camp ya Pungro Community Health Center (CHC) nung Dr. Weri Mero, Medical Officer lenisüba kübok par teloki ayongzüka liasü, kong kaketshir 997 tashi Oral Cancer atema screening agiba den minor dental procedure agia liasü.

Punjab nung sepai pezü khaset

New Delhi, April 12 (Agencies): Bodhbar anepdang zungia Punjab nung aliba Bathinda military station nung Army artillery unit nung sepai pezü khasetogo.

Punjab Police den sepaitemi iba tatalokba bushisüngdangdar aser parnoki ashiba agi, iba ya kiralongra tatalokbabo masü.

Asür sepai pezüji arrshi küm 20 dak temapurtem dang lir; parnok amoi oa lia anepdang 4:30 ako meta kari injang khalokja liasü.

Iba tatalokba sülen Army Chief General Manoj Pande-i Defence Minister Rajnath Singh nem iba osang metetdaksü.

Osangbenertem den jembidang Bathinda Superintendent of Police (Detective), Ajay Gandhi-i, iba tesem nungjagi INSAS rifle ka den injang terep 19 nguogo, ta metetdaksü.

Sepai kati ashiba nung ajemdaker Ajay Gandhi-i, civilian süoshi nung nisung anati injang khaloktsü, ta metetdaksü.

Asür pezüji arrshi küm 25, Sagar Banne, Kamalesh R (24), Yogesh Kumar J (24) aser Santosh M Nagara (25)

nunger lir, ta jangaago. Par pezüji ana Karnataka nungi aser ana Tamil Nadu nungi liasü.

Injang khaloktsürtemji sepaitem asü? ta asüngdangba langzüdang Gandhi-i, iba tatalokba ya tang bushisüngdangdar, ta ashi.

Bhatinda Military Station nung injang khaloktsüba tesem nungjagi INSAS prangpong ka nguogo, ta army temi metetdaksü.

South Western Command-i sangdong ka ajanga, anogo ana tejaklen INSAS prangpong ka den injang 28 samar liasü; ibaji densema lenla balala tsütsülen nungi bushisüngdangtsü, ta metetdaksü.

South Western Command-isa, "Iba ama tia maka tatalokba nung artillery unit nungi sepai pezü injang agi yirua mekümtükteti süogo. Iba tatalokba nung tangarbo shinga meyiru mesüra osettsüset/kiojen meraksa," ta metetdaksü.

Bathinda Cantt police station nung IPC kübok Arrla 302 den Arms Act kübok Arrla balala nung ajemdaker mejangjaba nisung ana anema FIR benokogo, ta police-i ashi.

2024 küm atema Opposition longjemtsü merangtsü: Nitish Kumar



April 12, 2023 nü New Delhi nung Bihar Chief Minister Nitish Kumar, Deputy Chief Minister Tejashwi Yadav, Congress Tir Mallikarjun Kharge, Congress lenir Rahul Gandhi aser JD (U) Tir, Rajiv Ranjan Singh nunger senden amenba sülen tangokba noksa nung angur.

New Delhi, Rongchii/April 12 (Agencies): Bodhbarnü New Delhi nung Bihar Chief Minister, Nitish Kumar aser deputy chief minister, Tejashwi Yadav nati Congress Tir, Mallikarjun Kharge aser Congress lenir, Rahul Gandhi na ajurua 2024 küm Lok Sabha election atema Opposition longjemtsü asoshi o lemtepogo.

Senden tembangba sülen osangbenertem den jembidang JD(U) tongti lenir, Nitish Kumar-i, "Ni Opposition party

ajak longjemdaksütsü merangtsü. Onoki tatembangsa Congress den-a jembiego," ta metetdaksü.

Kasa senden nungji Kharge aser Rahul Gandhi nata liasü.

Rahul Gandhi-ia, "Iba ya opposition longjemtsü atema mera tajung ka agiba lir aser onoki opposition party tem mangdang ka yanglua tejakleni bener aotsü. Linük atema onok longjemer nokdaksü," ta metetdaksü.

Tawa Kharge-ia Opposition lenir aika ajurua BJP anema opposition longjemtsü atema jembiego. Kharge-i Tamil Nadu Chief Minister, MK Stalin aser taoba mapang Maharashtra chief minister Uddhav Thackeray nata ajuruogo aser maneni opposition lenir aika ajurutsü tebilemba lir.

JD(U) tongti lenir, Kumar-ia 2024 Lok Sabha election atema BJP den madenba party balala nungi lenirtem ajurua opposition longjemtsü atema jembitsü.

Kumar-i AAP tongti, Arvind Kejriwal aser Samajwadi Party Tir, Akhilesh

Yadav na den regional party balala nung tekolakpurtem ajurutsü.

Taoba mapangtem nunga Kumar-i Congress densema Opposition party tem dang 2024 küm BJP tamakok ngudaksütsü atema opposition longjemtsü ayongzüka liasü.

Kumar-i Delhi semdanga Congress lenirtem ajuruba aija Bihar BJP Tir, Samrat Choudhary-i, "Kumar-i Ato kilonser akümtsü nükjilding lir, ajsüaka ibaji kodanga mataloktsü, kechiyong nüburtemi Ato kilonser Narendra Modi aser pa lenisüba nung tamang akar," ta ashi.

Yaküm September ita nunga Kumar Delhi-i oa Sharad Pawar, Arvind Kejriwal, D Raja, Sitaram Yechuri aser Akhilesh Yadav nunger ajurua liasü.

Taküm February ita nung CPI(ML-L) 11buba mongdang nung jembidang Kumar-i, opposition longjemtsü ajanga BJP-i menden 100 dang nungi ishiba angutsü, ta jembia liasü.



April 12, 2023 nü Greenbelt, Maryland nung Union Finance Minister, Nirmala Sitharaman-i NASA indang Goddard Space Flight Center semdangba mapang tangokba noksa nung angur.

GOVERNMENT OF NAGALAND
DIRECTORATE OF SCHOOL EDUCATION
 NAGALAND : KOHIMA
Kohima, the 12th April 2023

NO. ED/AEI-2/2023 **NOTIFICATION**

In pursuance of Government letter No. DSE/LEGAL/10-214/2023/931 dated 28th March 2023, it is hereby notified for the information of all concerned that the 'Nagaland Right of Children to Free and Compulsory Education (Manner of admission of Minimum 25 % children in Class I or Pre-school at the entry level for the children belonging to disadvantaged groups and weaker sections) Rules, 2016' notified vide Government Notification No. DSE/RTE/2011/1198 Dated, 24th November 2016 will be strictly implemented in all Private Schools functioning within the State of Nagaland with effect from the Academic Year 2024.

Those Private Schools which have not yet admitted students in pursuance of the aforesaid Notification shall give admission to a minimum 25 % of the strength of each Class to children belonging to disadvantaged groups and weaker sections from the neighbourhood as given below during the Academic year 2024.

- For Schools having Pre-School Classes (Pre-KG, LKG, UKG) as entry level : Admission in each class from Pre-KG to Class 5
- For Schools having Class 1 as entry level : Admission in each class from Class 1 to Class 8
- For Schools having Class 6 as entry level : Admission in each class from Class 6 to Class 8

Reimbursement of expenditure to the schools will be made as per provisions of section 12(2) of the RTE Act, 2009.

(THAVASEELAN K) IAS
Principal Director

 बैंक ऑफ बरौदा Bank of Baroda	DIMAPUR BRANCH Nyamo Lotha Road (Church Road) Dimapur- 797112, Nagaland Email: dimapu@bankofbaroda.com
[Rule 8(1)] KIOJEN AGIADOKBA NOTICE	
Securitisation & Reconstruction of Financial Assets and enforcement of security Interest (Second) Act, 2002 aser Security Interest (Enforcement) Rules, 2002 nung Section 13 (12), rule 3 nung aliba tashi nung ajemdaker Bank of Baroda, Dimapur Branch, Dimapur nung authorised officer-i 22.12.2021 anogo nung Demand Notice ka ajanga Mr. Daniel K Chishi dang notice agütsüba anogo nungi tenzüka anogo 60 tsüingda sen Rs. 24,86,869.87 (Rupees Twenty Four Lakhs Eighty Six Thousand Eight Hundred Sixty Nine and Eighty Seven Paise Only) agüjang ta tuyua liasü.	
Ajsüaka sen apuri senji magütsütem nung sen apur aser public dang, Security Interest (Enforcement) Rules, 2002 nung Section 13 kübok Sub-section (4) nung agüja aliba tashi amshia tsünglanglen sign süa alir officer-i April 11, 2023 anogo nung tsünglanglen shia aliba kiojen agiadokogo ta sangdonger.	
Talisa sen apur aser public dang iba kiojen dak sendakba inyaksangshi kecha masütsü tekümdangtsü metetdaksür, mesüra Bank of Baroda-i sen Rs. 24,86,869.87 (Rupees Twenty Four Lakhs Eighty Six Thousand Eight Hundred Sixty Nine and Eighty Seven Paise Only) den tetemlok meshitsü.	
Section 13 kübok sub-section (8) nung ajemdaker sen apur dang mapang shidak nung item kiojen alangzütsü metetdaksür.	
Kiojen osang tejangja:	
Purana Bazar, Dimapur, Mouza- 3, Dist.- Dimapur, Nagaland nung aliba Dag No. 344/2327, Patta No. 1685 nung tasazük 00B-02K-02Ls agi ayimjemba kimong aser kiojen (Residential).	
Bounded By:- North:- Main Road, South:- V V Chishi, East:- Pukhuri, West:- Raj Kumar	
Note: Technical kuli ajanga tamalen 29.04.2022 anogo nung agiadokba meyipa liasü.	
Date: 11.04.2023 Place: Dimapur	Authorised Officer (Bank of Baroda, Dimapur Branch)



TIR YIMYIM YIMOBILEM (EDITORIAL)

DIMAPUR YANGTEPNÜ, RONGCHII (APRIL) 13, 2023

Opposition-i NCERT textbooks yanglushiba magizüker

- P Tiamongba Aier

National Council of Educational Research and Training (NCERT)-i textbooks nung Mahatma Gandhi tepsetsang Nathuram Godse aser 1948 küm RSS mokdangba indang otsütem agienba atema Opposition lennirtem aser non-BJP state tem nungi education minister temi Centre aitsür. Yaküm NCERT-isa Class 12 textbooks nungi Gujarat riots aser Mughal rule otsütem agiena liasü. Rajasthan, West Bengal aser Kerala state education minister temi NCERT-i otsütem agienba khenyongi magizükba metetdaksüogo aser külen Andhra Pradesh, Telangana, Tamil Nadu o Odisha state education minister temi NCERT textbooks jungjunga reprangdangba sülen ang telemtetba agitsü ta shiogo. NCERT ya Ministry of Education kübok autonomous body ka lir aser parnoki textbooks nungi otsü kar agienbaji Covid-19 wara adokba sülen textbook rationalisation exercise nung shilem ka dang lir ta ashir. RSS-BJP ajanga putiotsü zülushitsü meranger aser iba ya tang mezüing masü. "1998-99 mapang NDA sorkar mapang iba mapatong ya tenzük saka RSS-BJP-i otsü yanglushitsü akok saka kodanga magientettsü" ta Congress MP Manish Tewari-ibo metetdaksüogo. Külen, Rajya Sabha MP tem- Kapil Sibal o Manoj Kumar Jha nati "Modi'er indang Bharat - Modern Indian history ya 2014 nungiang tenzüksüla" ta luja jembiogo. Rajasthan Education Minister B D Kalla-i putiotsü memelenshitsu olen ka ashidang "Mahatma Gandhi ya asen linük tebu lir aser pa asüba dak sendakba otsü meyanglushitsüla" ta metetdaksüogo. West Bengal Education Minister Bratya Basu-ia putiotsü yanglushiba magizüker aser tesüiba nung atalokba ka tanü yanglushitsü merangba ya putiotsü nung tatalokbatem agientsü merangba lir ta ashi. Odisha School and Mass Education Minister Samir Ranjan Dash-ia State Council of Educational Research and Training (SCERT) dang NCERT textbooks nung temelenshi asüba jungjunga reprangshitsü tetuyuba agütsüogo. Odisha state sorkaria NCERT textbooks nung temelenshi asüba reprangshimtsü atema task force ka shimogo. Maneni, Telangana aser Andhra Pradesh education minister temi tamasa NCERT-i melenshiba reprangdangtsü aser iba sülen ang curriculum nung enoktsü-meinoktsü telemtetba agitsü ta metetdaksüogo. Bihar Finance Minister Vijay Kumar Chowdhary-i putiotsü yanglushiba magizüker ta ashi aser CPI general secretary D Raja-ibo NCERT ya "National Council for Eradication of Rationality & Truth" ama inyaksangshir ta metetdaksüogo. Maneni, Kerala Education Minister V Sivankutty-ia Centre sorkari putiotsü yanglushiba magizüksü ta shiogo. NCERT-i textbooks nung tesüiba nung atalokba otsü kar agienba atema Kerala state sorkaribo 'supplementary textbooks' adoktsü telemtetba agiogo. India nung state temi higher secondary atema NCERT indang history, political science, economics, geography aser science textbooks amshir aser kümshia NCERT nungi temelaba agir menüngzüka amshir. Yaküm NCERT-i Class 12 textbooks nung Gujarat nung mepetmesü adokba aser Mughal yimsüsüba agiena liasü ajisüaka Kerala nungbo item topics dena NCERT textbooks menüngshir amshia liasü. NCERT nung state ajak nungi teshimtet nübotem dena tentetshitsüla aser Kerala-ibo NCERT ajanga textbooks nungi portions kar agienba magizüker ta Kerala Education Minister-i takhangba ka agütsüogo. Putiotsü yanglushitsü merangba mesüra lanu-putu nem tesüiba nung atalokba otsütem memetdaksütsü merangba nung lendong keta lir aser NCERT-i nisung/telok kari aginüba ama kümshia textbooks melenshia ora kobi melii kaketshirtemi Hindutva otsü dang angazüksüsa mapang ka ajurutsü. Anungji Nagaland state Education Minister/department/sorkaria tanga state temi tebilemstü abenba amaji Centre sorkar dang kümdangshitsü olen ka danga ashitsüla.

OLEMSABANG

Koba tashi bilemtar?

T. Lima Jamir, Ungma Aonglenden

Tamasa Minister aser MLA tem dang ya shinür, asen Nagaland ya Khristan lima aser Nagaland ji khrista asoshi ta noktaker aser ayimtener asünung asenok shiba taküm Tsüngrem amanger aser asen sür külen asen tanüla kotaki aotsüba amangertem lir aser asen Naga limai Yisu yimsü arur 151 buba jaja yonga aser liyonga arur. Anungji Minister tuluba nungi tenzük MLA tem ajaki asen Nagalandji Khristan lima ka ama Tsüngrem aküm tsübu nütüning nübur anishitsüla masü no? nenok minister aser MLA ajakji nenoksasa minister aküm masü nüburtemi shimba lir. Nisung ana asem dak alaka teimbaka sen aser tashiyim agi alizükba minister aser MLA tem lir.

Anungji ne ket nung sen lir ta sür Tsüngrem aküm metsübu asüküma aser ngsangatema liteptsü nungdak madoker aser nüburtemi nenok tenzüksü masü nenoki tang nütüning nübur tenzüksü aser peladaktsütsüla. Nenoki kechisa nangzüka lir item ajakji küm 5 majungdang Nagaland tilaka yabo kanga junga nüburtemi aginütsüsa inyaksütsü mepishir. Nütüning nübur tejashidaktsü aser longkak taitdaktsü. India govt-i anogoshia terenlok inyaksü asoshi sen yoker saka mapabo junga meinyaker. Election atongtsü mapang anasa India govt-i terenlok asoshi sen crore 35 yokba tua kong lir aser shirnok ket nung yua lir, asadangertemi ashiba aji Nagaland chief Ministerbai anir cabinet 10 crore pati aser parnok 11 rongnung Nagaland Chief Ministerba ket nung sen crore 4696 rongsen yua alibaji Naga nunger asoshi tebilemstü olura masü no? Aser cabinet 10 rongnunga sen crore 20, 15, 25, 30 tashia rizünga alitsü südi ta bilemer, aser cabinet 10 teküpok nung alirtemia rizünga alitsü südi. Item ajakji India govt-i terenlok asoshi yokba sen aser nübur indang sen lir. Maneni Minister aser MLA tem dang ya shinür asen Nagaland nung yimtsüing aser town kwi lir, ajak nung ali kibur (land owner) lir, tongtipangsa yimtsüing nung alir ali kiburtemji pei-pey yimkümdang obula nungertemi ali kimong aser alu wazüka yuja lir aser aji ali kibur temeten yangji shingaia teka aitsü makok. Tongtipangsa Ao kin ya kanga tang asüngteta aliba kin asünung kin kidong kinunger telemsa aika agi sünga aliba kin asünung ajakji akidang obula nunger shisa taka tekulok techira asünung parnoki tarutsü semchir semnur kwika renloka odir pei ki aser pei ali nung anisüngzüka alitsüba ali alu arem wazüka yutsübatem lir.

Anungji idakji shingaia teka yia ali aser kinung tax agitsü makok, yangji Ungma, Mokokchung yim, Khensa aser Chuchuyimpang yim pezü sanger ali kibur 'land owner' sanger temi ali aser kinung tax agi tashibo election makidaktsütsü aser aji ali kibur temeten tanü oboula aser otsüla nunger taküm meliaka par temoatsü nung alir asünung govt-i tekong meranga malitsü mepishir. Govtji tanü ka aser asüing ka ta melentepba yimsü asütsü asünung aser Nagaland nung aliba ali aser ki govt-i alizüka mali asünung govt melung masü nübur aser ali kibur melung aser aji Nagaland nung aliba yimtsüing aser town nung alirtem ali kibur temeten lir.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Manipur state nung sorkari Tenla ki asem bendoktsüogo



Manipur yimtiba, Imphal nung Evangelical Baptist Convention Arogo Tenla ki bendoktsüba sülen Arogo züngsemtemi osettsüset bendenba mapang tangokba noksa nung angur.

April 12, 2023: Manipur nung sorkar agency temi Tenla ki asem bendoktsüba sülen Arogo lenirtemi Khristantem dang tesünep meraksatsü ayongzüik.

Manipur nung BJP sorkari, Tenla kitemji state yimtiba, Imphal nung tribals kiyong ka nung sorkar li nung ozüing alema asüba liasü, ta metetdaksü.

Nüburtemi mesongtemtsü aser tensa meraksatsü atema sorkar agency temi April 11 anepdang züingia Tenla kitemji bendoktsü, ta Impahl nung aliba Arogo nung financial administrator, Francis Vialo-i metetdaksü.

April 12 nü osangbenertem den jembidang Khristan putir Vialo-i, Tenla kitemji ka Catholic Tenla ki, ka Baptist Tenla ki aser ka Lutheran Tenla ki liasü, ta metetdaksü.

Paisa, küm 20 tejaklen Holy Spirit Arogoi nisung ka dang nungi iba liji alizüka Tenla ki

yanglua liasü, ta metetdaksü.

Ali mangatettep ken oji tesüiba küm pezü tashi court nung angadanga aruogo.

"2020 küm onoki sorkar tetuyuba anema court nung ken o benoka liasü. Ajisüaka onoki ashiba ken oji magizük, kechiyong ali ayoksang jagi onok dang ali ayoktsü atema kulikaket taila yanglua liasü," ta Khristan putirisa metetdaksü.

Ajisüaka court-i sorkar tetuyubaji soita liasü aser 2023 küm March ita tashi iba ken o soita ata, ta paisa metetdaksü.

Taküm April 4 nü Manipur High Court-i 2020 küm tetuyuba agienba sülen anogo ishika tsüingda Tenla ki bendoktsüogo, ta Vialo-i ashi.

Arogotemi Tenla kiji Arogo meyong ali nung asü, ta kuli magütsütetba agi High Court-i ken o soita atabaji agien.

"Tenla ki bendoktsübaji onoki agizüker, kechiyong ibaji


sorkar tetuyuba lir. Onoki Khristantem dang süngjema alitsü aser kiyong nung tesünep alitsü atema ayongzüker," ta pai ashi.

United Christian Forum North East India nung otongdar, Allen Brooks-ia sangdong ka ajanga Khristantem dang maneni yimjung aser tesünep atema sarasademang, ta mepishi.

Osangbener den jembidang Zomi Christian Fellowship Arogo nung pastor, Rev. Jangkholum Mangte-i, "Onoki ozü nüburtem dang yimjung atema sarasademtsü ayongzüker, kümküma alitsü mepishir, aser iba tatalokba ajanga kiyong nung tesünep meraksatsü mepishir," ta ashi.

Nütsüing million 3.2 aliba Manipur state nung Hindu nütsüing shilem 41, Khristan nütsüing shilem 41 aser Muslim nung nütsüing shilem 8 shi lir.

Laishiba nung maliba/samaba tapu ka ngutetogo



April 12, 2023: Laishiba nung tapu (chapter) ka samar aliba küm 1,500 sülen tanaben ngutetogo; Laishiba züluba mapang nung Lai zülur kati ibaji aidok asütsüa akok, ta osang ka ajanga metetdaksü.

Aso 3buba nung aliba 'manuscript' ji tang Vatican Library nung yua lir.

Lai tekongtemji ultraviolet photography amshia dang ngutet, kechiyong Lai tekongtemji aidoker liasü. Akhidang teka agi züluba shidipak agi kanga anüingba agi tezüluba karbo aidoka liasü.

Mathi tapu 12 tekong 1 nung

Greek oshi nung meyipzükba nung saru sarur Yisu nütsüing yamai zülua lir, "Iba mapang nungji Yisui Amongnü alu ajanga süi; aser Pa nütsüingtem yaa liasü, aser tsükjong miita parnoki achitsü tenzüik."

Ajisüaka Syriac oshi nung meyipzükbajibo balaka, kechiyong iba nungji yamai shia lir, "parnoki tsükjong nungi tzük agizük aser teka nung menüingzüka achi."

Tang tashi nungbo tawa ngutetba Laiji shilem tilaka dang public nem metetdaksür; tetezü tesülen Vatican-i ano maneni Lai otemji

metetdaksütsü.

Austrian Academy of Sciences (OeAW) nungi putiotsü nung mongin Grigory Kessel-i sangdong ka ajanga, "Syriac Christianity-i Tejen aser Tasen Lai meyipzükba aika meteta lir. Tawa manuscripts ana nung dang osangtajung kaketem indang Syriac tejenba nung meyipzükba jangjar," ta metetdaksü.

Osangtajung kaketem-Mathi, Mark, Luk aser Yohan kaketem nung Yisu otsü tejangia lir, aser item kaket ya Tasen Lai nung kaket 27 nungi tongtibangba kaketem lir.

ANOGO ABEN TSÜNGREM DEN

Sarasademang, ataang mesüra mapa T.Ken 94:11-23

"Tamajung inyakeretm anema ni asoshi shibai noktaksü? Temenen inyaker anema ni asoshi shibai noktaksü?" (t.16). Iba tasüingdangba nung kechi koma telangzüba ka agütsütsü ni memetet.

Tebilemetsütem asoshi asenoki sarasadem dang asütsü mapang ka lir. Asenoki ataa alitsüba mapang ka lir. Tsüngremi "tangbo masü- ni tesülen ibai reprangtsü" ta ashitsüba mapang ka lir. Saka asenoki inyaksüba mapang ka lir. Mosa noktaka atar nüburtem Ejip nungi adokdaksüba, mesüra Dawidi Tsüngrem O bendangba mapa inyakdang ama.

Asenok alima tesangwa ama noktaker sangwadaksütsüba mapang ka lir, asenok alima metsü ama alima raksaa aodang aji kümzüksü amshitsü mapang ka lir.

Terepranger ka ama, "Junger, ni iba atema sarasademtsü" ta ashitsü koda temüla! Junger, yamaji inyakang. Saka Tsüngremi ashir, "Ni atema tamajung inyaker anema shiba noktaksü?" Telangzüba: Shirnoki Tsüngrem parnok Teyarir ta meteta lir parnoki noktaksü. "Kibubai ni meyarilasang Kü nela sür lila" (t.17). "Saka Kibuba kü mitsa aser kü Tsüngrem, kü lung, shiba dak ni jenoker" (t.22). Kodang Tsüngrem ne teyarir lidir, kodang Tsüngrem O nung aruba Tsüngrem tashi na katir, nai iba lima temenen anema noktaktettsü.

Shirnok temenen nungi pilaa lir mapa inyaksü ajar. "Temenen chuba menden, kobai temenen ozüing kümdaksür, ibaji ne den telungjem lidima?" (t.20). Tanü asenok temenen aika nungi kümzüksü ozüing kar.

Aji saka shirnok temenen nungi pilaa lir, parnoki tamajungba anema Tsüngrem den noktaksüla- Pai tatem nung takok agütsütsü ta amangertem. Asenoki rara karbo makoktsüsa akok, saka Tsüngrem tenüing sangang asenoki raraji akoktsü!

Tamajung inyakeretm den Khristantemi pelaa malitsüla. Asenoki parnok den sarasadema, ataa aser mapa agi inyaksüla. Tsüngremi na Pa asoshi tawabangba ka südaktsüner. Pai na kong yutsür idakji taküm aliba kuli ka süa liang. Kodang nai sarasademer, ataa alir mesüra shilem agir, Pa leniba asüingdangang.

Bangladesh nung Khristan 8 tepsetba sülen nisung aika jenshi

April 12, 2023: Taoba Brihostibarnü (April 6) Bangladesh kübok Chittagong Hill Tracts nung telungpur telok ana khatepba mapang tribal Khristan 8 tepsetba sülen nisung 200 shi jenshiogo, ta osang ka ajanga metetdaksü.

Bandarban district kübok Khamtangpara yimdak Khristan ti tepsetba sülen nisung aika tetsübu nung jenshiogo, ta Bawn lisopur lenir, Naiton Bawn-i metetdaksü.

Osangbener den jembidang Naiton Bawn-i, "Nisung 200 shi jenshiogo aser tang parnok sorkar school tem nung jenoka lir. Sorkari parnok nem chiyungtsü agütsür. Tensa süngjemba sülen ang parnok kidangi meyipa aotsü. Onok Bawn nungertem tetsübu nung alir," ta ashi.

April 7 anepdang Police-i tasüing ti angu, ta Rowangchhari sub-district nung police tongti, Abdul Mannan-i metetdaksü.

Asürtem ajakji Khristantem liasü; nisung pezü Baptist Khristan aser nisung pezü Presbyterian Khristan liasü, ta Presbyterian Arogo nung pastor, Georgy Loncheu-i metetdaksü.

"Onok Good Friday aser Easter Sunday nung temelung kanga shiranga mungogo. Onok Bawm nungertem kanga shisabulur. Easter Sunday nü onoki asürtem atema sarasademtsüogo," ta Loncheu-i osangbener nem metetdaksü.

Mannan-i, yangji alirtemi tribal telungpur telok ana- Kuki-Chin National Front aser United People's Democratic Front tsüingda khatepba osang police nem metetdakja liasü; tasüing aliba anasaji onoki prangpong ana nguogo, ta metetdaksü.

Loncheu-i, asür tiji Kuki-Chin National Front nung züngsemtem asütsüa akok; kiralongrertemi parnok kaset saka parnoki parnok ya telungpurtem ta ashir, ta metetdaksü.

Iba yim ya Ronwagchhari jila kübok lir. Yaküm October ita nung security sepaitemi Kuki-Chin National Front anema operation tenzüka mapang nungi iba jilai raliwalirtem arutsü memelar.

Chittagong Hill Tracts region kübok Bandarban, Rangamati aser Khagrachhari district tem lir aser Muslim nütsüing teimba aliba linük nung tribal nütsüing aika alibaji iba region ya lir.

**AO OSHI ANGAZÜKDAK:
TANÜ ANGAZÜKTSÜBA OJANG**



Pokta

(n) ano rüken küma temai madok (banana shoot)
* Rüken **pokta** aon nung ngashi enoka asoba junger.

Poktzütem

(n) tebok telung nung tzü bendendak (bladder)
* Tain akümdang nisung aika **poktzütem** timtem ajurur.

OLONG PAITEP # 6485

	1	2		3	4	5
6					7	
			8	9		
		10				
11						
			12			
13	14	15				16
17					18	

TIPLÉN

- 1. Inyaker ajangtetba - (3)
- 3. Bangsemo adokdak - (5)
- 6. Shitak mesüi inyak - (7)
- 7. Ya mimong nung angur - (3)
- 9. Reprangzük - (4)
- 10. Tasola - (5)
- 11. S _ _ _ _ - (4)
- 13. Yagi ajak ashioxtsür - (3)
- 15. Ki aokba oset - (7)
- 17. Ak shi nung inokba tasen - (5)
- 18. Ishika - (3)

LANGTSÜNGLEN

- 1. Meshidak - (3)
- 2. Tanaben soshir - (7)
- 3. Iba anogo - (4)
- 4. Meshi - (3)
- 5. Yagi mi tsükloker - (9)
- 6. Shi tapu ka - (9)
- 8. Yagi ayimer saka ozü masü - (3)
- 9. Ajokba shiruru ka - (7)
- 12. Inyaktet - (4)
- 14. _ _ _ hi - (3)
- 16. Akümüli nungi pilar - (3)

OLONG PAITEP # 6484 TELANGZÜBA

TIPLÉN :

- 1. Telok, 4. Aluru, 6. Ozüing, 8. Emk,
- 9. Kin, 10. Teti, 12. Süir, 13. Jen, 14. Ola,
- 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kioktsü,
- 5. Lenti, 7. Tajangzük, 11. teronem,
- 12. Sempa, 13. Jahaz.

KHEN SHISADANGDI

MOLUNG DANGTSÜ O

Alokbai Aor Minister aser MLA tem dang molungdangtsu O ka yamai metetdaksür.

Oh..... Aortem, küm 5 (pungo) Chuba menden nung mendaksü dang, nür ajungtsü dang bilema, kiojen, district ajak nung alidena, Nagaland atena orr a India tesem balala nung alia yur, election canvassing nung 80%-90% meinyaka ta tatok meshia jajaba yimya anenang. Nür ali aser ki alitsü atemabo benden, nübur asoshibo meinyakbu, ta jembibaji taktsü mapa ta angatedang.

~ Aienla Ao

Tanur asoba anogo nung salem osang den noksa angati adokdaksünüra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

Tepela
Tasoba Anogo



- 1. Tenüing :
- 2. Tasoba anogo:
- 3. Küm : 4. Class :
- 5. School :
- 6. Talidak :
- 7. Salem osang :

CM Biren Singh-i kanga tongtipang kaket ka sayatsü



Imphal, April 12, 2023

(Agencies): Manipur Chief Minister N Biren Singh-i Bodbarnü kaket tongtipang ka sayaogo aser iba ya state sorkari mapa tajung inyakba rongnung ka lir.

Biren Singh-i kümsük tanaben atema Chief Minister akümba sülen 'A Compendium of Important Decisions of Manipur Information Commissioner' indang kaket sayatsü.

"Iba ya state sorkari mapa tajung inyaktetba rongnung ka lir aser sorkar ketdangsüba nung

tashishitsü melii inyaksangshiba indang mapa ka lir" ta CM Biren-i ashi.

"Commission-i RTI Act ajanga sorkar department balala indang tongtipang osang agütsür. Tanü sayaba kaket ya state sorkari tashishitsü melii ketdangsüba indang kuli tajung ka lir" ta paisa metetdaksü.

"Tia maka state documents timi bendena mali. Taoba state durbar nung documents timi yua mali aser iba ya sorkar junga ketdangsüba asoshi kanga tongtipang lir" ta paisa ashi.

Manipur State Durbar, 1907-

1947 ya British yimsüsüba kübok Manipur aliba mapang liasü. Durbar mapang Manipur nung chubatem aser yimsüsürtem indang osang tera dang yua liasü. Shisashirtem aser Durbar züngsemtemi miim kulikakettem parnok ket nung dang ayu.

"Tanü nisung aikati Durbar indang miim kulikakettem agütsür aser iba kaket nung manguba documents dena lir. Maneni tarutsü anogotem nisungtemi sorkar ket nung miim documents agütsütsü" ta CM Biren Singh-isa ashi.

Ukhrul nung arishi küm 40 tain tebur ka khaset

Imphal, April 12, 2023

(Agencies): Ukhrul district headquarters nungi kilometer 4 shi pilar Choither Radha nung mejangjaba nisung kari arishi küm 40 tain tebur ka khaset.

Tasüsang tekolak nung injang anati akhaba zübo keta liasü aser pa indang pocket nung Rs 3270 bena liasü.

Tasüsang teka süngzü agi

tesülen alener liasü aser pa tejak azü agi yimpanger liasü ta Manipur Police-i ashi.

Iba lendong ya Mongulbar aonung atalok aser osang angashili Superintendent of Police Ukhrul Ningshem Vashum aser SDO/SDM Ukhrul Block Suranjoy Maibam Singh na tesem tonga ao.

Iba nisung ya Th Khalmi (40) ta jangjaogo aser pa ya

Ukhrul district kübok Asipung nung liasü.

Jawaharlal Nehru Institute of Medical Sciences, Imphal nung post-mortem asüba sülen pa tasüsang kinunger ket nung agütsüogo. Iba tatalokba atema telok shingiaia tenüing agiba osang mali aser Ukhrul police station nung FIR ka benokogo ta police-isa metetdaksü.

Bihu committees 2114 shia nem Rs 1.5 lakh agütsütsü

Guwahati, April 12, 2023

(Agencies): Assam state sorkari April 14 nü Saat Bihu amungtsü atema mapa kar inyaksü ta Chief Minister Himanta Biswa Sarma-i ashi.

Guwahati nung aliba Srimanta Sankardev Kalakshetra nung CM Sarma-i Assam nung küm 10 tain Rongali Bihu Celebration Committees khen yaritsüba osang metetdaksü.

Bihu committees nem Rs 1.5 lakhs agütsütsü aser iba nung Kamrup (Metropolitan) nungi committees 120 dena lir, ta pai ashi.

"Taküm onoki Bihu committees 2114 nem Rs 1.5 lakh agütsür" ta CM Sarma-i ashi.

May 16 sülen nisung shingiaia Bihu amongtsü memelatsü, ta paisa ashi.

"May 16 nungi Assam nung Bihu mamongtsü saka tanga sobaliba sentongtem amongtsü akok. Iba atema Bihu committee temi mapa inyakang" ta Sarma-i metetdaksü.

Paisa Bihu committees dang 'Chanda' (donations) mebendentsü aser sobaliba husori nung shilem agütsü ayongzük.

Benjung amongba sabang nung yi ajemba azüoktsüla aser iba atema Bihu committee temi tenük yoktsüla ta CM Sarma-isa metetdaksü.

Assamese nungeri taküm Rongali Bihu nung Saat Bihu amongtsüla aser state sorkari sangküm nungi Saat Bihu amongtsü, ta paisa ashi.

Rongali Bihu ya anogo tenetnü atema amonger aser iba dang Saat Bihu ta ajar.

April 13, 2023 nü 'Bihuwan-Bihuwati' ajak asoshi osang tajung ka metetdaksütsü ta CM Sarma-i olen ka ashi.

Guwahati nung Sarusajai Stadium nung Bihu rehearsals reprangdang "ni tanü kecha mashitsü saka April 13 nü 'Bihuwan-Bihuti' ajak asoshi sempet tajung ka agütsütsü" ta CM Sarma-i ashi.

April 14, 2023 nü Sarusajai Stadium nung Prime Minister Narendra Modi lia Bihu tsüingsanger aser aseüm atemer nisung 11,000 temai Bihu tsüingsangtsü aser iba sentong ya Chief Minister Dr Himanta Biswa Sarma-i ketdangsüa agütsü.

Assam sorkari Guinness World Record angütsü alizüing yur iba sentong ayongba atema state nung nübor aikati sorkar nem tenüingsang agütsür.

Taiwan ruling party-i tir atema William Lai shimogo

Taipei, Rongchii/April 12 (Agencies): Taiwan nung tang yimsü testüdak party ajanga Vice President William Lai ya taruba küm tir election nung par candidate asütsü shimogo.

Democratic Progressive Party (DPP) ajanga Lai shimba yagi China jashitsü temetet, kechiaser Taiwan nüjiso atema Tir Tsai Ing-wen dang pai tejembiba.

Beijing-i Taiwan ya par litsü ama züngshir aser pei sasa yimsü asüba asetkong den tanaben lungjemtsü asoshi tashiyim mamshitsü ta shia mali.

China-i Taiwan temeket nung asemnü military drills aliba tembanger ananü buba nung DPP ajanga Bodhbarnü iba osang ya sangdong.

"2024 tir election nung shilem agütsü aser Taiwan kumzuka ayutsü asoshi mapa inyaktsü atema DPP ajanga ni shimba asoshi kanga pelar," ta Lai-i Taipei nung osangbener dang ashi.

Tsai melentsü asoshi DPP nungi arishi küm 63 tain Lai ya shimtsü mapang talangka nungi asadanga arua liasü, kechiaser Tsai ya küm pezü kümsük ana

May 2024 nung tembangba sülen ano linük tir asoshi tokteptsü memelar.

China peladakja Taiwan-i tarutsü nung yimjung mongutettsü, ta Lai-i mapang talangka nungi jembia arur aser iba asetkong nung aliba nüburtem dang dangar asoshi mebilemi yimsü asür anema lungjemer nokdaksü ajungshia arur.

Bodhbarnüa pai kasaji ashi. "Alima nung democratic bloc ajanga China ya alima asoshi timtem lir ta tangbo angatetogo aser Taiwan Strait nung yimjung alitsü tongtipang ta bilemer," ta Lai-i ashi.

"Rara nungi pila alitsü asoshi raratsü renema alitsüla, rara ka anentsü asoshi nai rara ka nung raratettsüla."

2016 küm Tsai shimba sülen China-i mitkar, tesendaktep aser rongsenketzung tsütsü Taiwan mesüshia arur, kechiaser lai iba asetkong ya shinga daka metaloka maliba linük ka ama agizüker.

Tsai kümsük ana tir inyakba Lai-i tushia jembia aser la lenisüba kübok alimai Taiwan tali jangjaogo, ta ashi.

"Tarutsü nung ni democratic lenmang kasa nung democratic Taiwan tashi itshidaktsütsü, aji asünung dang alimai Taiwan indang jenjang metettsü aser agizüksü," ta pai ashi.


Taoba mapang doctor inyaka aliba nungi yimten yimsüsür akumsang Lai yagi pa "pragmatic Taiwan independence worker" ka lir ta ashir.

January ita pai Taiwan ya dangar kübok maliba linük ka lir, anungji ano nüjiso nguogo ta sangdongtsü nungdak mali, ta shia liasü.

Taiwan nungeri nüjiso nguogo ta sangdongtsü mera ka danga agira mitkari telangzüba agütsütsü, ta Beijing-i tekumdangtsü shia lir.

"China-i o tamajung shia mitkar tashi amshitsü amokmerenba mapang asenoki yimjung tsütsü asen tajemdakba memelenshitsü," ta Lai-i ashi.

"Yimjung asoshi asenoki atapisa malitsü. Taiwan Strait anatsülen nübur takum tajungba akumtsü asoshi anatsülen nungi külemi inyaktsü nungdaker," ta pai ashi.



India-i US ambassador tasenba Eric Garcetti ya mapa tenzüksü tanü New Delhi tonga arutsü. Pa India nung US ambassador 25 buba asütsü. Pa ya tamalen Los Angeles City council member liasü aser iba sülen 2013 küm Los Angeles yimti nung 42 buba Mayor aküm aser 2017 tashi inyak. Pa ya piano atemtsü aser noksa agütsü jangraba nisung ka liasü. (April 12, 2023).

Tir inyaktsü asoshi toktepba kodanga maitsütsü: Trump

Washington, Rongchii/April 12 (Agencies): Mapa tamajung inyakba ken o New York nung taoba hopta benokba sülen tang mezüngbuba sensaksem dang taoba US tir Donald Trump-i 2024 küm White House asoshi toktepba kodanga maitsütsü nangzük.

Adult film actress nem miima sen agütsüba mechi New York nung ken o 34 tashi benoka alisang Republican telok nungi takarsang-i Fox News anchor Tucker Carlson dang ashiba agi, kecha agia pa tir asoshi toktepba menokdangtsü.

"Ni kodanga maitsütsü. Aji kü yimya masü. Ni aji meinyaktsü," ta pai ashi.

Arishi küm 76 tain Trump taoba hopta pua meyongnem agizükba sülen mezüngbuba

sensaksem dang arishi küm 80 tain Democratic telok nungi Tir Joe Biden ya tokteptsü asü masüar mejangja ta shia liasü.

"Aji takoktsü ama ni mangur. Ya tain atema masü... Pai meinyaktettsü ama bilemer. Temang shi aser tekolok shisatsü agia Biden-i makoktsü ama bilemer. Ni aji mangur," ta Trump-i ashi.

Trump aser ano danga Republican lenirtemi aiben Biden dak tamang makatetba jembia arur.

Fox News ama right-wing outlets temi mapang shia Biden-i o jembibetba aser shisa rama mesük ajitetba tem tuteta sayur.

Iba sensaksem mapang Trump-i maongka agia okadak pa yariba indanga ashi aser pa okadaki aodang nisungtem

jeptepa liasü ta ashi.

"Yangji inyakertem jeptepa liasü... Parnoki küden tejashi lemsatpe," ta pai Carlson dang ashi.

Trump tir inyakba mapang Fox ajanga pa bukuma liasü, pa mebelaba sayu aser mapang kaka pai jelia osang magütsü arua mapang talang-lang otsü atonga liasü.

2020 küm Biden-i takok anguba sülen tesendaktep mokonga akum, saka Republican nungi tir asoshi tokteptsü atema nübuyim tenzüka mapang tesendaktep tajungba akumer.

Election nung tamakok ajuruba sülen Carlson-i Trump anema jembiba temai adoker hopta ishika lir tena sensaksema liasü.

Myanmar military-i tayimtsü amshia amakba nangzükogo

Yangon, Rongchii/April 12 (Agencies): Myanmar military-i ashiba agi, parnoki iba hopta tsüngda yimtsüng ka nung parnok anema nokdakba telungpurtemi ayongzükba sentong ka agia aliba mapa iba tesem makogo aser civilian tem tepseter lira kiralongrartemi parnok kangshia yaridaktsüba ajanga lir.

Mongolbarnü northwest Myanmar kübok Sagaing tesem nung tayimtsü amshia tesem ka amakba sülen tanur densema nisung 100 shi tepsetogo, ta media sangdong balala ajanga metetdaksü. Tawa military-i tesem balala maka aruba rongnung iba lendong ya tamajungtiba asütsü.

2021 küm February ita Aung San Suu Kyi-i aniba sorkar atsüngtoka military-i sorkar kümetetba sülen Myanmar nung mepetmesü tulu adoker lir.

Military yimsüsüba anemer kari lokti nung nütsüng agi jema aliba kin kar indang telungpurtem den longjemer parnoki prangbong hadir balala bener rara arudar aser military-ia meyiper parnok tatimtsü aser hadir tulu bener maka arudar.

Sagaing nung tayimtsü amshia nüburtem amakba ya U.N. Secretary-General Antonio Guterres-ia aitsüogo aser aibelenertem anema jenjang tapet agütsü ayongzükogo, ta pa otongdari ashiba den Guterres-i maneni

linük ajunga nung military-i Myanmar nungertem amakba anentsü asoshi ayongzükogo.

Junta otongdar Zaw Min Tun-i military broadcast channel Myawaddy dang Mongolbarnü ashiba agi, National Unity Government (NUG)-i parnok indang armed People's Defence Force atema ayongzüktsüba sentong amakba ya iba tesem nung yimjung bener arutsü atema liasü.

"Sentong lapokba mapang onoki iba tesem maka liasü. PDF züngsemtem tepsetogo. Parnoki linük sorkar aser nüburtem anemer," ta Zaw Min Tun-i ashi.

(Maneni tapak 8 nung...)

KOHIMA LONGKONG SENSO TELONGJEM

KOHIMA, NAGALAND: 797001

TENÜNGSANG AGÜTSÜR

Kohima Longkong Senso Telongjem züngsem tajung asem sorkar tenzüka mapa nung temaba jenjang anguba atema KLST-i pelaba iba osang kakat ajanga lemsateper. Nenok sempet aser nübu tajung ajanga sorkar tenzüka nung iba jenjang ajangzükogo aser tarutsü nung maneni nenok mapa ajanga asen sorkar aser nüburtem tajangzük südakang ta KLST tamang aser sarasadem.

1. Mr. S. Senka Jamir, Deputy Director nungi Joint Director promotion, under Horticulture Department.
2. Mrs. Yashijungla, Section Officer nungi Under Secretary promotion, under Nagaland Civil Secretariat.
3. Mr. Limanungsang Jamir, Section Officer nungi Under Secretary promotion, under Nagaland Civil Secretariat.

Sd/-
(IMLIWAPANG JAMIR)
President, KLST

Sd/-
(AKUMSASHI)
Secretary, KLST

TENÜNGSANG AGÜTSÜR

Tetemjen lenir Wb. Supongmeren Hoki (Chungtiayimsen) Nagaland Empowerment of People through Economic Development (NEPED) nung Chairman inyaktsü Nagaland sorkari shimtetba asoshi Chungtia Hokipong kidongi kangasa pelaba den tetushi tulu agütsür.

Tematiba Tsüngremi lenir tajung nübur tenzüka wadang nung maneni len ania moajangma.

Sd/-
I. Wati Samen
Hokipong Kidong

Sd/-
Subongchuba
Secretary
Hokipong Kidong



OFFICE OF THE
AO SENDEN

"Nübur Asashi" (For the People)

SANGDONGER

2023 Moatsümunng May 1- 3 anogotem nung Ao Sendeni ayongzuka Mokokchung Town nung amungtsü sentong renemdagi. Anungji iba benjungmung sentong nung tamakok alutsüsa lokti balalai mejangjungi sentongtem renemdaktsüner aser nübur ajak arua shilem tajung agia adentsü Ao Senden mendenti ajanga jelia ayongzuka atar.

Sd/-
Wb. CHUBAWATI LONGCHAR
President

Sd/-
Wb. ARENTEMJEN JAMIR
Asst. Gen. Secy.

Taekwondo asaya nung medal angurtem nem tetushi agütsü



Dimapur, Rongchii/April 12 (TYO): Taekwondo asaya nung medal angurtem nem tetushi agütsüba sentong den repsema takok tajung anguba asayartem asoshi scholarship programme amenoktsüba aser academy trainees atema remedial class sentong April 11 nü Hall A, I G Stadium, Kohima nung agiogo.

Iba sentong nung Advisor Youth Resources & Sports, Keoshu alakteta jaoker liasü. Pai medal angurtem nem tenüngsang agütsü aser tanga trainee tem dang medal angutsü atema bendanga agütsür meranga inyaktsü ajungshia liasü.

Paisa, trainee tem dang

yimya yimpong azüoktsü aser tali bendanga agütsüshitsü ayongzüka liasü.

State nung sempet aketba lanurtem aika sports academy nung mezüngoksemteter ta shia pai trainee tem dang iba facility ya takokba tashi amshitsü ajungshia liasü.

Maneni sentong nung Director of Youth Resources & Sports, Akhumla Chuba-i, takok tajung anguba asayartem atema department-i scholarship agütsütsü asoshi benokba indang metetdaksü, koba category balala küma lemsar senotsü teyari agütsütsü ta ashiba den academy trainee tem

nem remedial class agütsütsü sentong aliba lemsatapa liasü.

Tetushi agütsüba medal angurtem rongnung 36buba National Sub-junior Taekwondo Championship nung gold medal angur Shiusuthong Tikhir (23 KG category) aser 25 KG category nung silver medal angusa Shiuthong; 5th Cadet-under 14 years National Taekwondo Championship nung Under 41 Kg nung bronze medal angusang Manong Konyak, 45 Kg nung bronze medal angusang Thongti Thonger aser 57 Kg category nung bronze medal angusang Longkhon Phom nung densema lir.

4buba Mkg Town Inter-Ward Football asayamung osang



4th Mokokchung Town Inter-ward Football Tournament yangi Imkongmeren Sports Complex, Mokokchung nung Alempang ward o Dilong ward na asayaba mapang tangokba noksa nung angur. Mokokchung, 12th April, 2023.

Mokokchung, Rongchii/April 12 (TYO): 4buba Mokokchung Town Inter-Ward Football Tournament tanü agi asemnübuba April 12 nü yangi Imkongmeren Sports Complex, Mokokchung nung mezüng asaya defending champion Mongsenbai Ward o Marepkong Ward na asayaba Mongsenbai Ward-i goal 7-0 agi Marepkong madak takok tulu ngua liasü.

Tanabuba asaya, Alempang Ward o Dilong Ward na tsüngta asayaba, Dilong ward-i goal 1-0 agi Alempang pur akok. Tasembuba asaya, Penli Ward o Artang Ward na asayaba tena shingai mekoki goal 2-2 nung draw asü.

Mezüng asaya Mongsenbai o Marepkong na asayadang, Mongsenbai nungi Jersey No.

17 - Toshinungsang-i minute 15 & 58 nung goal kaka metsüoktsü. Tanüngba goal-temji; Jersey No. 5 - Limasunep, jersey No. 11 - Menjor, jersey No. 7 - Imnatoshi, jersey No. 15 - Yangersosang aser jersey No. 8 - Nungcheter par pezüi minute 7, 28, 34, 44, 51 nung goal kaka yok. Mezüng asaya tesadang asaya tashibo goal 3-0 dang liasü, tanüngba goal 4 ji tanabuba asaya tesadang nung idaktsü.

Tanabuba asaya, Alempang Ward o Dilong na tsüngta asayaba, Dilong nungi forward jersey No. 10 - Takotoba-i asaya tatemtsü minute 3 dang dang lia goal tajung ka metsüokja iba goal yagi par teloki Alempang madak takok angu. Mezüng asaya tesadang tashibo tena katia goal magütsüti liasü.

Tasembuba asaya nung, mezüng asaya tesadang tashibo teloki katia goal magütsütet. Asayartem anisüngzüik agir külen, mezüng aser tanabuba goal-ji Artang nungi forward jersey No. 8 - Supongmeren-i idaktsü. Saka Penli pur mesamai meranga asaya arur, Penli midfielder jersey No. 11 - Jungshiwati-i 53 minutes nung goal ka yok aser par medemer jersey No. 10 - Osa Chang-i asaya tatemtsü minute 2 dang anünga lia goal ka agütsür, iba asaya shingai mekoki kasasa nung tembanga liasü.

April 13, 2023 asaya

yamai alitsü:

LijabaLijen Ward Vs Kumlong Ward @ 1:00 PM
Sangtemla Ward vs Tongdentsuyong Ward @ 2:30 PM

Dr. Savizo N Yhome memorial Tennis Cup tenzükogo

Dimapur, Rongchii/April 12 (TYO): 2buba Dr. Savizo N Yhome memorial Tennis Cup Bodhbarnü Chavino Peseyie Memorial indoor stadium tennis complex, Kuda village, Dimapur nung tenzükogo.

Asayamung koba küm ana nung khen asayar iba asayamung ya Kohima District Tennis Association aser Dimapur District Tennis Association na longjemer ayongzüka asayar.

Iba asayamung ya tebur kija asaya, tebur taep asaya, veteran tarep asaya aser tarep temeyoktep asaya ta category balala küma lemsar asayar.

Asayamung lapokba sentong nung alakteta jaoker ama shilem agiba mapang Abeio Kire, IFS (Retd.)-i ashiba agi, tennis ya nisung

aikati asayar ajisüaka südoksünemtsü atema dang asayar. Kümtem tsüngda state nungi national asayar kar adokogo aser state nem konang tetushi bener arutsüogo. Iba asayamung ajanga state nung tennis asaya ajungketba nung shilem tulu agitsü, ta pai ashi.

Paisa, nisung aika jenjang tajung aser rongsena peria lir, ajisüaka anema melira ajakji amajok akümstsü, ta pai ashi. Paisa, asayartem dang taküm libaliro asüngteta alitsü ajungshiba den anema aliba ya taküm nung ajak dang tongtibangtiba lir, ta ashi.

Maneni pai tennis asayartem parnok sempet arangtetsütsü atema sabang tajung agütsüba atema Dr. Savizo'er kinungertem dang kanga pelaba lemsatapa liasü.

Myanmar military-i tayimtsü... (Tapak 7 nungi...)

"Osang ajanga ashiba agi, onoki parnok indang prangbong hadir rizünga ayuba tesem amak aser iba tesem apokba ajanga nüburtem tepseta liasü," ta pai ashi.

Civilian tem tepsetba atema aitsüba indang jembiba mapang pai, "parnok kangshia pusemdaktsürtem kar asü asütsü," ta ashi.

Zaw Min Tun-i ashiba agi, noksa ajanga asürtem rongnung karbo uniform aser kar civilian süoshi semer aliba nguogo. Paisa, PDF puri parnok züngsemtem tepset sernung civilian tem tepset ta osang tai agütsüba aija liasü.

Maneni pai, rara nung aibelenba aser PDF pur pu masemba tesemtem nung monk, tesayur aser tai maketba nüburtem tepsetba atema PDF pur aitsüogo.

U.N. Human Rights tekolakba Volker Turk-i, junta-i osang magütsü tsüngda iba tesem amakba aitsüogo aser ashiba agi, "asürtem rongnung tsüngsanga aliba school tanurtem aser tanga civilian tem densema liasü."

Iba tesem nung alirtemi ashiba agi, military-i iba tesem amakba sülen civilian densema nisung 80 nungi 100

tsüngda süogo, ta BBC Burmese, Radio Free Asia (RFA) Burmese, aser Irrawaddy news portal-i metetdakja liasü.

PDF züngsemtemi ashiba agi, tanur 16 densema tasümgang 100 shi remtsüogo.

"Lendong nung nisung kwi asü iba indang osang tejangja memetet. Iba tesem nung nisung temang shilem balala merepshia lir," ta PDF züngsem kati ashi.

Myanmar nung military anema nokdakertem ket nung military-i tayimtsü amshia amakba nokdangtsü atema tashi mali.

Taoba küm October ita military jet kati kentenba sentong ka amak aser nisung 50 tepseta liasü, kong kentenertem aser Kachin State nung telungpur züngsemtem densema liasü.

NUG otongdar Kyaw Zaw-i ashiba agi, Mongolbarnü nisung 100 shi sür alitsü, koba military-i kecha tebilembangba makai inyaksangshiba ka lir.

Civilian tem amak ta aitsüba military-i magizüker aser ashiba agi, parnok linük raksatsütsü merangba kiralongrartem den rarar.

BILEMDANGANG

"Tetsükdak majurui takok anguba dang nungibo tetsükdaktsü aika ajurua takok anguba tanangba."